

## „AN SYNE PRINCELICKE EXCELLENTIE.

Geven U. F. G. in aller behoerlicker onderdenigheit ende reverentie to kennen die gedeputierden der stadt Harderwyck, alhier tegenwoirdich, woe dat dieselve stadt, in dem forstendom Gelre gelegen, swack ende vervallen van muyren ende vesten ende anders quelick versihen, doch toe water ende lande also well gesituirt, dat, wanneer dieselve naer noetdrufft gesterckt ende versihen waer, niet alleen een bequame plaetse soll wesen tot bescherminge derselfsten inwoenderen, dan oick mede tot groet vordel van de naebuyrlanden ende steden dienen koennen, dair oick die regierders mit die beste ende voernemlickste burgern alsoe well tot die gemehne saicke ende wolfaerth geneicht syndt, dat sihe van begin an niet sonder oeren mercklicken schade ende bederff sich altiitt guetwillich gewaeghet ende thom besten hebben vinden laeten, oick noch voertahn nae oeren vermoegen geern getrouw siin ende blyven wolden. Dan all waere die plaets noch soe propys ende gelegen, oick die wille der burgern noch soe guet, soe syndt doch by oen die middelen ende het vermoegen niet omb soedanige onkosten van fortificatien ende anders allene tdragen, want, behalven dat noch by minschenleven

die stadt op sehr weinich huysen nae geheel afgebrandt ende sehr die tiidt wederomb mit brandt ende belegeringe niet weinich bedorven is worden, volgentz oer neringhen ende ambachten vergaen, soe ist sihe oick lestlick in dese beroerten myt plonderinge ende lanckwilige besweernisse des garnisoens alsoe ondergekomen ende bynae uthgepuirt, dat sihe het qualick genoeg hebben poerten ende muyren tegen 't gewalt der zee staende tholden ende der stadt saicken up landtdagen ende anders toe verwaren, voele weinigher, dat sihe myt oer vermoegen die stadt voer gewalth solden fortificieren ende tegen den viandt holden koennen. Jae, wanneer der viandt in diese oere gelegentheit darwertz quame, solden sihe noetweindich dieselve stadt ende plaetse tot vordel van den viandt moeten quitiren offte sich alle deerlick dairinne laten ommebrengen ende vermoerden. Unde angaende 't behulp van andere steden ende platten landen desselven forstendombs offte quartiers soe ist seker ende wel kenlick, dat, indien tot dieser fortificatien van andern gien mehr behulp als van desen solde toe verwachten siin, soe sal die stadt Herderwyck voertahn wal ongefortificiert blyven liggen als suss lange.

Opdat nu effenwel die stadt ende burgern van Herderwyck in diesen an oerer syden niet mangelen, sihe selfst beschermt ende die nabuyrlanden oick t'beter moegen bewaert blyven, soe presentiren sihe voerierst ende syndt willich tot fortificatie derselver stadt op oer toe nemen ('twelck ghen cleyn bedragen solde) die affguedinge der landen, soe dairomme solden moeten vergraven worden, ende daertho (baven alle andere schattingen, die sihe daegelix dragen) noch by middel van capitale weecke- offte maendtschattinge mit malckanderen bynnen sekere behoerlicke tiidt op to brengen driesent keisersgulden eens, van twyntich stuvers br. 't stuck, behalven wess noch van averentzige steen van der stadt muyren ende anders diergelycken tot dieselve fortificatie solde moegen gebrueckt worden.

Ende hoewell die stadt ende burgerie genslick ende ongetwyvelth verhoepen hiermyt nae oere sobere gelegentheit wel t'sullen moegen volstaen, opdat sihe nochtans niet schynen in oer selfs saicke selfs een mate t'stellen offte sich nae oer qualiteit niet hoeghe genoeg geschattet thebben, soe presentieren sihe widers ende sindt overbodich, wanneer die fortificatie sal volbracht siin ende alsdan bevonden worde, dat sihe mehr als vors. hiertoe solden behoeren toe contribuiren, dat sihe sulcx geern willen stellen tot erkenneniss ende discretie van oern genedigen Hern Stadtholder, den Walgebaernen Graven tho Nassauw-Catzenellebagen etc.

Bidden dairomb ende versoecken die gedeputierden van wegen der stadt Herderwyck vors. gantz oetmoedelick, dat U. F. G. wil gelieven hierinne tot oere assistentie ende behulp alsoe toe versihen, als U. F. G. naer eisch, noet ende conservatie dierselver stadt ende naebuyr-provincien sullen bevinden tho behoeren, opdat die saicken mytten iersten in 't werck gestalt ende soe balde moeglick volbracht moegen worden. Ende sulcx doende."